

Literarna sekcija OŠ „Hilmi ef. Šarić“
Školska 2019 / 2020. godina

Literarni radovi učenika povodom 5. novembra Dana 9. Brdske brigade

Deveta brdska brigada

Kada sam odlučila da pišem o Devetoj brdskoj brigadi, informacije o njoj sam najprije *proguglala* na internetu kako to i radi moja generacija. Saznala sam da je formirana od jedinica teritorijalne odbrane i da joj je osnovni zadatak bio odbrana Puta spasa koji je povezivao Sarajevo sa slobodnom bosanskom teritorijom, te još poneki podatak iskazan u brojevima i datumima.

Svoje saznanje podijelila sam sa roditeljima koji su mi kazali da su to samo suhoparne činjenice koje se mogu izraziti brojkama, a da ja mnogo toga još ne znam i da trebam naučiti.

Rekli su: „Deveta brdska brigada je mnogo više od niza historijskih činjenica jer, ona nije formirana - ona se rodila. Nastala je kao rezultat borbe za život, kao rezultat spašavanja vlastitih domova.“

Objasnili su mi kako je na pragu 21. vijeka njihov, do tada, bezbrižan život prekinut ratom. Ljudi su ubijani, mučeni, protjerivani iz svojih domova iz razloga što su pripadali jednom narodu - razloga koji je neshvatljiv Čovjeku.

Teško, a nekada i nemoguće je bilo prihvatiti činjenicu da je opasnost prijetila od poznanika, prijatelja, komšija. Ljudi su se naivno tješili da se njima to ne može dogoditi iako su vidjeli da se najveći zločini dešavaju vrlo brzo, čak i u susjednom mjestu. Tek kada je opasnost postala tolika da su vlastiti životi došli u pitanje, osvijestili su se.

Svaka porodica je imala po nekoliko članova koji su učestvovali u odbrani države. I muškarci i žene su imali svoja zaduženja.

Roditelji su mi detaljno objašnjavali kako je to izgledalo.

Ispričali su mi kako je moj otac otišao u rat kada je imao osamnaest godina, kako je moj dedo dao život za našu budućnost, kako je moja tetka dobila obavezu da radi u apoteci. Cilj je bio spasiti gole živote od mnogo jačeg neprijatelja, a to je moglo jedino potpinim, jedinstvenim, nesebičnim zalaganjem cijelog stanovništva.

Sada sam i ja shvatila da Deveta brdska brigada nije samo historijska činjenica, nije samo vojna formacija satavljena od desetine vojnika, nego mnogo, mnogo više od toga.

Deveta brdska brigada to je zajednički duh cijelih Hadžića u borbi za opstanak i pobjedu nad agresorom, to je naša snaga, naša nada, naš spas, naše zajedništvo i nesebičnost, ono što je u nama i u čovjeku naljepše i najvrednije, to su prošle generacije, generacije mojih roditelja, deda i nana.

Ali - Deveta brdska brigada smo i mi - buduće generacije čuvara Bosne. Zato nikad ne smijemo zaboraviti dug prema našim dedama i očevima, nanama i majkama, a to je da našu domovinu čuvamo i štitimo onako kako su to oni radili.

Farah Horman, VII 1

Literarna sekcija OŠ „Hilmi ef. Šarić“

Školska 2019 / 2020. godina

**Literarni radovi učenika povodom 5. novembra Dana
9. brdske brigade**

DEVETA BRDSKA BRIGADA

1992. godine u vrtlogu strašnog rata,
za odbranu naših domova Ona se formirala.

Hadžićka sva općina Njoj sinove dala
za spas njene djece i ono što imamo sada,
9 brdskoj brigadi neizmijerna HVALA.

Od Košćana do Bjelašnice, od Kreševa do Ilidže,
sa junakom do junaka posustala nikad nije.
Časno branila je svoje
da nam sunce iznad Bosne svjetlost daje i da grije.

Lamija Maslo, VII 1